





禪兩朝史

題趙仲庸所畫袞塵馬

匹馬袞塵誰所寫天水王孫最文雅王孫系宋不系
唐那識唐人與唐馬左輔白沙白於雪四十萬頭名
各別廐中此馬帝長騎一色紫霞名叱撥馬官似隸
王毛仲左手執刷右持鞚沙平草暖不被鞍芻苣飽
來筋力縱翻身倒豎蹄鐵蹄露尾風鬃亂不齊元是
滇池赤龍種猶思躍浪湧春泥太平無事征戰少青
絲絡頭可終老不似交河赴敵時夜蹴層冰僵欲倒

青樓怨

劉渙

錦樓花霧飄綠塵芙蓉屏深凝淺春微酣着人嬌欲
睡綵雲載夢隔湘水雙螺小娃催理粧粉綿拂拭鸞
鏡光濃黛掃眉桂葉長涼露濯手薔薇香家本石城
南市住早年悔作青樓倡十八梳成金翅髻青蟲簪
滑鴉背膩歌聲遠梁揭塵起細簧咽秋鳳鷓語翠綃
舞衣珠珮結研金天鵝銀蛺蝶神女騎龍別楚宮巫
雲蜀雨隨峽風別離何多懽會少牛女隔河怨秋老
黃衫少年下樓去馬蹄隆隆浩無主

閨中聞子規

孫蕢

交疏日射房櫳曉碧樹初聞子規鳥驚回殘夢了無

懽慘切新愁破清悄獨宿何曾下綉帷寧勞勸我不
如歸鶯花爛熳江南道好向遊人醉處啼

梁父吟

江水何深深青楓映雲林衡門一杯酒抱膝梁父吟
君不見夷吾奮袂投南冠故人薦引登君門揚眉吐
論下荆楚九合冠裳朝至尊又不見樂生徒步從西
來燕昭一擁筵調笑黃金臺轅門一日建旌節七十
齊城生暮埃古來英俊人所遇皆有立袖有驪龍珠
能令鬼神泣而我獨何為幽宮凍蛟螫荒蘿遶屋秋
雨涼山鬼吹燈冷光濕幾欲乘雲朝太清芙蓉縹緲

白玉京天田角井散飛霧阿香布鼓琅璫鳴星辰可
望不可即手把琅玕空復情為臣自古良獨難我更
懷之摧肺肝田疆古冶三猛士昔者虎視青齊間誤
罹相國二桃計恨血今為春艸斑白頭動舊且如此
何況新知無醜顏梁父吟聲正苦日落未落天星黃
西園灌木秋楚楚青青千里艸如霧兀兀當塗高踞
虎長陵百尺空嵯峨夜半山精泣風雨世無女媧五
色石天柱欲倩何人補荊州水碧岷峨青思羨王孫
渺何許梁父吟聲苦傷歌闌玉壺缺白髮千丈長起
坐擊長劍仰天悲流光西歸白日為誰晚東流之水

何泱泱青冥黃鸝倘垂翅我亦凌風隨爾翔

白紵四時詞

姑蘇臺上春風和江花亂落江水波交疏揚柳絲差
差華筵夜開列綺羅宮筵西施間群娥朱顏為君起
微醺自拈紅牙按清歌飛花著人思繁多華月耿耿
度斜河踈星出河夜欲過烏啼啞啞奈爾何

閭門輦路薰風時江光瀲灩芙蓉被翠羽霓旌照洲
渚鸞輿向夕初清暑西施含顰嬌不語群娥鬪起歌
白紵迴風舞袖為君舉歌聲窈窕一何長白紵之白
白如霜木瓜花紅荔子香東江月出而江光銀壺酒

多樂未央

館娃宮畔風蕭蕭芙蓉墮霜楊柳凋銀潢影淡烏鵲
橋熒熒雙星麗碧霄美人微醉臉紅潮筵前舉袖催
玉簫齊歌白紵鬪妖嬈越羅楚練風雨飄此時奉君
情欲絕銅龍夜深宮水咽銀牀低轉梧桐月

江風吹波口宛宛江天飛雪簾櫳滿美人樓上閉腰
肢羽觴清間昭華管筵前西施含醉歌歌停綠水聲
欲緩群娥玉鬢低款款別宿臺前水仙館芙蓉帳高
錦雲暖儂覺寒宵作那短

阿嬌怨

妾昔初入昭陽時橫雲學得內家眉風鬟霧鬢在君
側長得君三不自持侍宴前搃春爛熳承權別殿夜
逶迤西涼絃索龍香撥北苑蒲萄金屈卮一從寵薄
恩光歇長門求巷宣呼絕斗帳香銷蕊蕊垂舞裙寬
褪丁香結重籠夕倚瑣窗雨羅襪秋寒玉階月淒迷
夢醒心似灰零亂憂來涕如雪橫塘浦口大江邊女
伴年年憶采蓮雙飛翡翠渾如畫並蒂芙蓉只似仙
旁舍誰吟白華曲下堂長咏綠衣篇君恩若許重相
惜缺月清光應再圓

休洗紅

休洗紅洗紅顏色落莫思君思君懷抱惡君恩原不
淺妾命由來薄君如白日不回光妾有芳情向誰託
洗紅洗紅休莫莫

白頭母吟

杜彥正

白頭母征人婦銀釵零落鳳凰股天寒日暮練裙薄
脉脉無言倚庭樹良人何在西從軍出入干戈死為
伍腰間寶劍霜雪光逐隊齊行砍妖虜鼓衰力盡生
死決野曠天青塔鈴語鬼妻悲號鬼為舞泪血如珠
濺行路郎今一去歸何時櫻桃花開春滿溪側身西
望骨欲折千里烟塵暗邊埒君不見東陽御麵顧渚

茶年年上供天王家月團小餅盤龍鳳玉塵什襲浮
霜花祗今喪亂殊未已武夫競爾誇豪奢大明揚輝
照村塢願見清平好官府延秋不聞烏夜啼版圖復
入無東西翻慮此身先奄忽不得親收杞梁骨落花
冥冥墜紅雨遲郎歸來華表柱若爲化作紫鴛鴦一
雙飛上青雲去

玉仙謠

金德儒

紫皇宮闕開中天鸞書畫下邀羣仙神麈玉斲新蹄
圓蹠蹀上送雙嬋娟虹垂橋雲沓路鞭敲風馭騰霧
寶幢金節相後先宛在銀河影邊渡侍兒顏色春花

明照耀十二樓五城飄飄宮徵相諧鳴按歌齊唱昇
天行昇天未成曲愁壓巫山綠朝朝暮暮湘水深湘
妃帝子徒勞心東飛烏西飛兔海變桑田知幾度燭
龍肯緩羲和轡流光應向人間住流光不住將柰何
半令蛾黛秋霜多手摩銅狄嗟蹉跎人生誰似學仙
好翠掃鬢華長不老下視寰垓入烟草岌岌瓊臺夢
要眇丹霞姿旁人可望不可追珮環一落空中響世
上猶存千載思

青藜杖

董佐才

北斗城頭風露涼閣名天祿隣未央卯金之子校書

倦嘿思周孔參羲黃黃衣老人叩閣進青藜杖端吹
火光光如崑山燭龍照几席炯炯鬚眉蒼共談來今
及往古義理玄奧辭精詳自非神功俄頃助經籍至
道淪微茫太師靈壽謾榮寵葛陂龍竹徒荒唐豈如
天上有太乙能使人間文運昌雖云過眉尺度短扶
持聖教千年長當代人才亦豈少好著更生居上堂

短歌行

黃肅

來日苦少去日苦多人生不滿百痛當奈何當復奈何
何不如沽美酒置此高堂上與君長咲歌峻坂無停
車急川無停波不如沽美酒置此高堂上與君長咲

多
歌人生不滿百當復奈何痛當奈何來日苦少去日

裁衣行

劉秋

裁衣須裁短短衣短衣上馬輕如飛縫袖須縫窄窄
袖袖窄彎弓不礙肘短衣窄袖樣時新殷勤寄與從
軍人願郎着衣便弓馬破敵長驅古城下明年佩印
披紫衣裁衣不比從軍時

雪篷散人草書歌

林鴻

雪篷散人有嫖裔翰墨游心與神契摹臨秘帖追晉
風揮灑雄文明古制華門鐵限人爭求荒郊瘞筆應

成丘媿媚雲霞情變態傾邪風雨寒颼颼伊余與君
共鄉縣結交自昔忘貧賤銜盃落拓膽氣豪江樓墊
寺書題遍借問君書初若何君言妙悟應聞謁諧音
本自車振鐸渙汗有類風行波乃知至理無不寓要
在高人會其趣古來入室惟逸少後者升堂有懷素
當代如君誠亦稀莫嘆蹉跎一布衣有錢沽酒與君
飲醉後目送孤鴻飛

經綺岫故宮

行人曉飯青山裏驅馬蒼茫經洛水昔聞綺岫盛繁
華不謂荒涼今若此憶昨行宮初構時梯巖駕壑相
逶迤美人柱殿夜看月公子拓弓朝射麋翠華一去
千門鎖露殿飛螢山月墮往事吹殘牧笛風危基半
入樵人火今古銷沉能幾回春風依舊野花開君三
巡狩不復見禾黍空山鳥雀哀

題蘇堤春曉圖

張壁

殘月流光弄清曉湖天空闊青山小露浥春泥不動
塵馬蹄輕入香風裊紫烟籠翠春茫茫行人不歸空
斷腸啼鶯喚醒綠窗夢千絲萬緒情短長南北高峰
隱晴碧天地無塵同一色群鷗飛向水雲西點點遙
看鏡中白蘇公已去三百年蘇堤春色今依然春去

春來人易老，樹樹飛花散。晴昊人生行樂能幾何，謾把金尊白傾倒。昔年曾醉湖山裏，婀娜春容照羅綺。明月清風不用錢，誰識光陰若流水。年來三月花如簇，擬向東風吹紫竹。喚起多情蘇小姬，更唱當時太平曲。

未央宮瓦頭歌

貝翹

赤龍西飛入咸陽，烏騅噴火焚阿房。阿房已灰騅亦逝，渭水參差開未央。未央宮殿中天起，乃公見之怒。仍喜壯麗方推相，國能萬戶千門從此始。南山相對雙闕開，函關夜啓侯王來。奉觴上殿呼萬歲，拔劍斫

柱何雄哉。玉階一污新都履，舊宅重開洛陽水。東西照耀四百秋，漢基半與周基似。長楊昨夜西風早，錦繡椒塗跡如掃。誰言長樂殊未央，回首青青千里草。可憐遺瓦至今存，古今不剥莓苔痕。銅雀有歌哀白日，鴛鴦無夢恨黃昏。梁國老人愛奇雅，錦囊得之百金賈。節齋風雨伍陳玄，猶作金人淚如瀉。朝來搨得寄江城，舊物相看無限情。白髮張衡足愁思，何人相與話西京。

題劉百川王母醉歸瑤池圖

劉昭年

瑤池春暖波如澱，不與紅妝洗嬌面。仙娥泛月蓋宮

來催宴琅花開水殿麻姑滿進流霞觴金盤鮓熟芙蓉香歌雲繚繞紫鸞管舞飈微灑春霓裳阿母戲春淡粧束雲冠巧作梅花玉酒痕上臉呼不醒扶上仙山雪毛鹿錦袍半脫露香肩飛鞚不動金連錢天風吹夢渡弱水含羞倦倚雙嬋娟歸來吹拂龍鬚席汗濕鮫綃醉無力玉鈞齊上水晶簾十二樓臺月光白吳興畫史筆有神丹青貌得瑤池真劉郎好事識仙趣看花同賞玄都春圖中彷彿一相見何必逢萊問清淺急呼青鳥答瓊箋蟠桃明日重開宴

題碩定之墨竹

朱經

虎頭諸孫總痴絕老安不痴乃用拙憶在吳中寫墨君雪楮冰縑每飄撇妙處不減文湖州同時更有柯丹丘眼底只今無此客使我悒悒懷風流蒼梧想見斑竹活看畫忽焉憂思豁安得二老從之游搔首涼風起天末

題蘆花散人小像

朔雲化石忽五彩石也能言泣真宰玉堂調笑辭金魚月冷西湖醉魂在風流憶尔承平時接羅倒着驢倒騎仙遊何處驚墮影秋空冥冥如見之黃鶴飛鳴杳無跡西風滿地蘆花白玉龍吹斷不可招空掩畫

圖三嘆息

皇明風雅卷之十

皇明風雅卷之十一

七言古詩二十六首

題黃文獻公撰盤峰先生墓銘後 許廷慎

盤峰先生有道者弱冠英聲振朝野舒卷心遊海上
雲高風遠激千秋下宋道降至咸淳時玉網一墜難
扶持北騎長驅踐華夏鳳兮鳳兮嗟已而似道當權
肆鷹犬誤國之軀豈勝鬱陰精晝吐白日昏坐使忠
良扼其腕後來文相鉅見收國事已去紆策籌翠輦
南巡竟不返離離木黍悲宗周盤峰山人舊朝士鬢
髮飄蕭欲何俟會蔽甘從夷叔遊艸玄羞殺楊雄死

時時舒嘯林谷間拔劍尚欲屠樓蘭英雄用武無尺
土新亭有淚空潺湲惜哉先生不可識兄弟齊名况
難得百年文獻逝凋殘往事徒傳墓前刻節士當時
謝侍郎飲恨餓死旃裘鄉兩賢英聲到今在忠義儼
皦垂三光丈夫夔屈思養晦榮華撥向浮雲外偷生
不與仁義俱身後清名竟安在吁嗟出處古則然撫
卷益嘆斯人賢何得東行訪遺老悲歌一吊桐山前

題餘姚張氏翠竹軒

四明之西天姥東青山嶠起摩高穹若翁種竹住其
下巴覺地與桃源通手招仙人碧雲裏石室陰陰落

花紫秋風夜半天上来洶若滄溟六鰲起憶昨紅塵
暗江海金谷平泉一時改冰枯雪死斤斧餘不意此
君今尚在拂石彈琴坐碧溪懸岬峒杳吹雲霓蟄龍
春翻后土裂皓鶴夜舞青天低百年行役悲陟岵軒
中故物誰為主葛陂變化元有神白髮淮南夢烟雨
我家有竹千萬竿老屋蕭瑟常風寒浪迹天涯未歸
去作詩媿此青琅玕

短歌行贈王自適先生

王君繪事何絕倫妙處不減曹將軍平生閱士千百
輩掉頭耻貌尋常人自謂傳神若臨鏡鏡中形態隨

所定靈臺迥絕塵外機筆法方窺畫中聖世人覩貌
不覩神英雄往往迷失真漢宮金多醜女好蛾眉
使埋胡塵吁嗟此事君所惜我亦念茲心戚戚江湖
迴首方倦遊煩寫閑身伴松石

題林周民山礬圖

山礬入畫古所少我昔見之倪璿家問君何處得此
本水屋十月來春花東風著樹香滿雪長鬢滴露金
粟結一枝獨立霜霰餘已覺江梅是同列惜哉此物
知者稀深林大谷多所遺牧豎樵童爾何苦剪伐毒
同荆棘歸林君本是鰲頭客高卧雲間人莫識酒酣
揮袖卷新圖一咲西山眼中碧

題趙撫謙六書

六書變滅同雲霞後有作者誰專家考亭先師昔志
此老弗及為猶嘆嗟君生遠在考亭後執策無從道
何投力窺篆隸著明言百世重是清門胄陰陽垂象
日月懸宮徵迭奏聲相宣神融理得非偶爾旁暢曲
通因自然荒墳斷簡科斗蠹猛雷破石天書露昔人
辨鑿極微茫非君孰得知其故文章與世相推移道
在勿憂知者稀休風一散久當復我已識子窮幾微
時時灑翰寫胸臆巧匠旁觀慘無色短梭掛壁風雨

來古劍騰波百靈泣往代揚雄空好竒閉屋草玄頭
盡絲至理無聞世無補更千萬語今何為趙君趙君
當自惜持此自可垂金石聖賢陸學久寥寥上帝毋
令六丁得

題林盤所學民家歲温日觀葡萄

張顛草書天下雄醉筆往往驚羣公温師作畫亦若
是我知畫與書法通葡萄何來自西極枝蔓連雲引
千尺世間畫者誰最高温師自有葡萄癖當時豪貴
爭邀迎掉頭輒走呼不應酒酣耳熱清興發揮灑始
覺通神靈東家雪練西家帛布地待師師不惜芒鞋
踏墨雲海翻滿把驪珠輕一擲百年畫意誰見之破
幅蕭條今尚遺心垢都除入清淨不爾妙悟何能為
憶我携書客淮右大官都送葡萄酒寒香壓露春甕
深風味江南未曾有林君對此心忉忉謂余亦種葡
萄苗何當釀酒二千斛愁來一飲三百瓢

畫馬

曹韓畫馬久絕筆近代作者多駑駘毫端不得千古
意孰識世有真龍媒圖中此馬何所似人言昔產余
吾水一聞高價傾千金更覺雄心少千里雙瞳鑠電
筋拳竒索不可繫胡可咎變化應隨霹靂去死生或

與英雄期消人買骨吁足恠漢武勞師動橫潰豈知
神物在人間驪黃迥出天機外我生愛馬癖莫醫眼
見畫圖神欲飛滎河真種倘可致西坂弱水扶桑歸

放歌行

劉績

銅駝故國風烟慘譜牒煌煌猶可覽軍壁焚燒紀信
車諫臺攀折朱雲檻當時圭組盛蟬聯世澤相承五
百年城中甲第連雲起樓上歌鐘鎮日懸人生貴賤
如翻手萬事紛綸無不有國步艱難徒扼腕世情猜
忌唯鉗口亂離家業散無遺環堵蕭然隱在茲門前
屢揖經漁士眼底不挂屠沽兒十載飄零寄他縣懶
將衣食看人面橐裏長嗟無酒錢牀頭却喜留詩卷
東鄰惡少鬪鷄回白璧黃金滿屋堆也知六博無高
手時至君看好采來

大堤曲

春風起大堤歷亂樓前柳樓頭多女兒解勸襄陽酒
襄陽估客足黃金百千爭買女兒心采萸帳薄鎧光
透翡翠衾重蘭氣深蘭氣未銷鎧未滅合權交縮下
香結良宵一刻惜如金黃金易擲情難歇前舡南商
去後舡北商來不知粧鏡匣今夕為誰開

送周明德應詔之京師

閶門柳條未堪折，只宜相見不宜別。人生踪跡各東西，半是車輪與馬蹄。把酒送君城北路，曉日鴉啼烏柏樹。一聲歌罷，淚滿巾。僮僕催人上塘去，願為轆轤纏青絲。轆轤可展心，不移男兒出處。自有分與君，那得不相離。官家有程行，莫緩後夜相思月。還滿。

題宋院人畫盤車圖

大車盤盤牽不住，小車碌碌推還去。上阪下阪日千迴，不離太行山側路。吳鹽蜀米塞滿箱，烏犍耳濕筋力強。商人重貨不畏虎，飯牛夜夜宿車傍。妻孥不須念行旅，橐中有金皆樂上。星飡露櫛逐隊行，但願利。

多無所苦道傍往來多，折軸誰人肯戒前車覆。

題李龍眠畫雪中捕魚圖

唐愚士

玉龍行空不成雨，首觸銀河落秋浦。帝遣神工種白榆，皓鶴飛來老鵬舞。榜兒踏舷依楚竹，不釣齊璜餌荆玉。波寒月黑大星稀，萬斛驪珠豈勝掬。夜闌緘素報麻姑，桑下塵飛海欲枯。何如去作蓬萊主，五城不夜無寒暑。

淮東女兒歌

一頁

淮東女兒飲淮水，錦紅纏頭金約指。正年十四十五多，鬢鬢春山鬪青蛾。阿爺自擬傾城色，黃金不多終。

不得西江估客浮大船年年賣珠淮水邊女兒門前
有高樹野鴛沙鷄得長住當筵舞罷結重懽百斛珍
珠馮秋露船空珠盡河水秋門前馬嘶金絡頭舊客
未盡新客留淮東女兒起高樓

題李白對月飲

方孝孺

明月出高樹上懸青天中下有萬頃之長江楊波泛
彩清若空江風吹人色淒凜此時對月誰能寢十千
斗酒何足論舉杯直就花前飲花前飲酒無與儔酒
酣意氣輕玉侯仰招行雲不可得但見月與河漢俱
西流仙人伐桂樹玉女倚瑤樓顧盼暫相悅棄去終

莫留昨日已浩浩今日復悠悠人生如飛光及時不
飲空白頭君不見月中玉兔搗靈藥不能醫此萬古
愁何人醉卧長不醒天地與我同虛舟混沌六合開
浩然何所求

壽徐廣文

胡虛白

丹丘仙人頭雪白玉宇高寒栖不得天日之陽多翠
微却跨黃鶴江南歸山田有秫澗有水鹿車同挽青
山裏龐公以安遺子孫足跡不踏襄陽市少微之星
白煌煌直與南斗相低昂東方小兒骨未脫玉桃親
見三千歲安得左持桃右持觴祝公壽登公堂天台

山高四萬八千丈願公與山同久長

芝原為富春馮孝子作

大樹將軍之子孫何年葬父靈山根仙翁騎鶴去不
返但見紫芝燁燁生靈原靈原叢叢一坏土上天應
念兒心苦千年石室發幽光得見靈芝如見父人言
服之可長年安得煉魄隨飛仙芝生在地父在天鶴
歸夜夜山之巔

送黃將軍之天台

溼漑之駒走千里雪花凝寒吹不起將軍仗劍出洪
都南來手挽天河水天河直下東海東扶桑虬枝樹

彎弓旌旗倒射海底日金烏夜啼華頂峰彼州之人
迎我侯此州之人不可留順風吹帆疾如馬碧水蕩
漾芙蓉秋九日黃花一尊酒醉把茱萸當楊柳將軍
自有穀城書勛業傳家應不朽

送海鹽崔彥齡孝子海外尋母

秦川有慈烏故巢遺一鷓鴣鳥飛南海去孤鷓繞樹鳴
相呼鳴相呼向何處萬里同天不同樹兒今日夜思
返哺夢中曾識瑠州路願鳥來巢庭樹枝驟雨顛風
終不移

黃鵠歌

太液池水清洎洎金衣菊裳下九天建章宮中生紫
烟鳳凰來儀羽翩翩至德廣被千萬年

春愁曲

瞿佑

杏雨調泥隨燕嘴烟重柳條扶不起採香胡蝶掛蛛
絲不惜將身為花死東風入幕動流蘇寶篆燒殘睡
鴨爐綉牀塵積錦機怨巧語誰能憑紫姑小研吳牋
雙鳳翅墨痕濃沁相思字玉釵半脫怕蒙頭寬盡玲
瓏金纏臂

折花怨

雙飛胡蝶翻金粉風裏流鶯栖未穩銀瓶汲水漾漣

漪下階自揀珊瑚枝雖然得入華堂裏未必春光願
如此樹頭花落還結子瓶內明朝抱香死東風一樣
發陽和豈知中道有嗟蛇人生輕出棄根本失枝落
節將柰何

故宮歎

金輪夜半北方起炎精未墜光先死青衣去作行酒
人泥馬來為失鄉鬼江頭宮殿列嶺岷湖上笙歌樂
宴安魚羹自從五嫂乞殘酒却笑儒生酸格天閣上
燒銀燭申王計就斬王逐累世內禪諱言兵中興之
功罪難贖開邊釁動終倒戈師臣函首去求和木綿

庵下新鬼哭誤國重逢賈八歌琉璃作花禁珠翠上
馬裙輕淚粧媚朔風吹塵笳鼓鳴天目山崩海潮避
往事興亡誰與論亭亭白塔鎮愁魂惟有棲霞嶺頭
樹至今人說岳王墳

舊日鏡嘆

美人在時對鏡粧美人去後鏡無光玉臺零落白鳳
凰錦囊拋擲紅鴛鴦夜深悄悄聞鏡語何不持掛墳
前樹新人新鏡自相宜舊物荒涼無所依

義士行

鍊金鑄范蠡買絲繡平原逝者恐無知徒用勞心魂

主之禪為主終當同禍福着主之衣為人出
任安念舊不改轍豫讓報讐須殺身酒不必澆劉伶
墳上土劍不必掛徐湛前窗感君恩重死相從冥
漠重泉有逢處

題錢舜舉寒林七賢圖

高得勝

騷壇逸響何寥寥作者逝矣誰能招詵然七子美風
度乃有遺像圖生綃衣冠半帶晉季氣人物絕是唐
中朝想當朝事得休暇擬采野景歸風謠青驃黃犢
踏凍前蹇驢瘦馬衝寒飈醉鞭笑停似按轡吟鐙戲

拍催聯鑣看花多情且少待尋梅有興非燕聊此圖
我嘗見十數高林大樹風蕭蕭掃除閑冗存簡素吳
興筆老才尤超方之粉墨巧塗染奚止天地相懸遼
尚疑高李六君子當時未見潘逍遙道同氣合志相
感雖曠百世如同僚畫師晚出有深意况自昔日傳
今朝屋梁落月見顏色妙處不待窮摹描君不見袁
安僵卧寒正驕王維乃作雪裏之芭蕉

鎮江舟中食魚

姚友直

金陵城中住七月客居無地憐彈鋏扁舟九月出
東大江秋水如白虹揚帆南下一千里江上人
作市大魚頭尾長過人壚頭香壓梨花春魚賤可食
酒可飲萬事盡付邶鄆椽

皇明風雅卷之十二

七言古詩二十六首

吊李翰林

解縉

吾聞學士真風流豪氣直與元氣侔金鑾殿上拜天子叱呼寵幸如蒼頭楊貴妃捧硯石高力士脫靴兜平生落魄贏得虛名留也曾椎碎黃鶴樓也曾趯翻鸚鵡洲也曾棄却五花馬也曾不惜千金裘呼兒換取采石酒花間滿泛黃金甌醉來問明月月映金波流大呼陽侯出東海騎鯨直向北極遊我來采石日已暮潮生牛渚聊艤舟白浪一江雪滾滾黃蘆兩岸

風颼颼我欲起學士相與更唱酬恐驚水底魚龍不
得睡天上星斗散亂難為收草草留題吊學士學士
不須笑吾儕磊落與爾元同儔

盧氏秋夜賦寄王院判

羈懷不自釋中夜卧復起長風吹河聲瀉入茅屋裏
青天高高素月橫露華淒落羅衫輕干將莫邪欲自
見中夜忽作雙龍鳴志士遭逢苦不早遠道憂心急
於擣謾說咸陽與洛陽昨日鶯花今日老我有母江
之南盈簪白髮絲髮髮柴門半掩綠樹下落日凝望
情何堪我有弟湖之北雲夢君山萬里隔三月歸鷓

又盡飛相思一字無由得金蘭交契王使君一日不
見心氣氲邇來為別忽三載夢魂跡遍江東雲平生
只欲事高潔骨肉交游總疏絕慷慨臨風一灑然淚
痕滿袖都成血衣袖初乾夜向晨古來忠義多艱辛
江鄉有路且歸去秋風綠水堪垂綸

中秋不見月

吾聞廣寒八萬三千脩月斧暗處生明缺處補不知
七寶何以修合成孤光洞徹乾坤萬萬古三秋正中
夜當午佳期不擬姮娥悞酒杯狼藉燭無輝天上人
間隔風雨玉女莫乘鸞仙人休伐樹天柱不可登虹

橋在何處帝閣悠悠叫無路吾欲斬蝮蛙磔冥兔坐
今天宇絕纖塵世上青霄粲如故黃金為節玉為輅
縹緲鸞車爛無數水晶簾外河漢橫冰壺影裏笙歌
度雲旗盡下飛玄武青鳥啣書報王母但期歲歲奉
宸遊來看霓裳羽衣舞

題文山上巳詩後

崕山雲寒海舟覆六載孤臣老燕獄東風壯宇三月
三五陵望斷春蕪綠墨花皇皇五十六寫出江南愁
萬斛當時下筆眼如虎日落天低鬼神哭披巾昔天
儀真船手持鰲柱擎南天間翠嶺海血灑檝回首家

國隨飛烟六宮粉黛黃埃裹漢火無光吹不起金鉅
冑學褚淵生嚼舌甘為杲卿死薊門草碧春淒淒高
官不換西山薇哀吟一曲肝腸裂勁氣萬丈蛟龍飛
當年恨殺葛嶺賊恨不剗心食其肉堂堂忠義行字
宙白日青天照遺墨落花寒食風雨時展卷如對龍
虎姿丹拜醉公金屈卮有酒不讀蘭亭詩

前有尊酒行

士備

前有尊酒我為君壽有瑟在筵有螯在手青年既徂
白髮被首於今不樂古人奚有自昔有言俟河之清
人壽幾何云胡不零起舞僊僊側弁以俄弗鼓缶而

歌恐大耋之徒嗟秋露如玉下彼庭綠良夜未央胡
不秉燭東陵死利西山死名莊周放達禹稷躬畊吾
誠何暇以論此前有尊酒君須傾

長歌行

有淚莫泣鮫人珠有足莫獻荆山玉赤心徒使按劍
猜至寶翻令咲魚目千金蹈海稱達人五噫出關西
去秦負芻不復遇知己空歌白石南山曾楚卿棄相
復何有於陵其作灌園與雜縣偶集魯東門惆悵胡
能事杯酒長風蕭騷百草殘長鋏悲歌涕洟瀾金臺
駿骨人已化瑤水風波不可攀畏途羊腸能折軸絳

書為謝雲間鵠海上三花久負期醉歸謾託平原宿

短歌行

東風吹花墮錦筵綠楊半暉青樓烟主人自為鷓鴣
舞小妓更奏鴛鴦絃當杯入手君不醉落日已在西
山顛短歌一曲心茫然請看明鏡高臺上何須白髮
悲芳年

怨歌行

絃奏鈞天素娥之寶瑟酒斟流霞碧海之瓊杯宿君
七寶流蘇之錦帳坐我九成白玉之仙臺臺高帳暖
春寒薄金縷輕身掌中托結成比翼天上期不羨連

枝世間樂歲歲年年樂未涯鴉玄粉白澹相宜卷衣
羞比秦王女抱衾誰賦宵征詩參差雙鳳裁筠管不
謂年華有凋換楚園未泣章華魚漢宮忍聽長門鴈
長門蕭條秋影稀粉屏珠綴流螢飛苔生舞席塵蒙
鏡空傍閑階尋履綦宛宛青陽日將暮惆悵君恩棄
中路妾心如月君不知斜倚雲和雙泪垂

君馬黃

君馬黃我馬白二馬同嘶出南陌南陌東阡夾渭橋
馬行平地似青霄羈金絡月人皆羨振玉鳴珂意自
驕朝出相隨暮相逐可憐人馬皆如玉如何與君生

別離君馬東行我馬西欲知後夜長鳴處羞對駑馬駘
一萬蹄

凌歊臺懷古

朝發石頭渚暮宿黃山道携酒眺古臺離離但烟草
憶昔茲臺何壯哉宋祖離宮臺上開臺前寶樹入層
漢臺下炎歊隘九垓楚山望盡蜀山出雄跨全吳勢
凌突欲吞銅雀俯中原不數黃金貴竒骨三十歌舞
宿雲端公子王孫往復還秦關捷書不再返鼎湖飛
龍誰復攀繁華一旦乃如此寂寂荒臺秋色裏往事
徒悲禾黍塲殘碑半墮滄江水滄江水流去不迴空

陵劫火變寒灰欲將霸業問行客黃山落日清猿哀

七賢度關圖

熊直

七賢之名奚所徵七賢去國身何輕風沙索漠幾千里道傍見者難為情君不是函谷關青牛白板春晝間又不是玉門道富貴生還致身早英雄出處貴有時何用驅馳嘆衰老歲晚征塗天雨雪數騎聯翩行欲歇不如灞陵橋上翁破帽吟詩自清絕惜哉命之不奔走半道周人生遇坎墮窮苦奚足左左遷與投散逝者良悠悠他人未足說所惜柳與劉天涯相聚一回首往事於人竟何有莫念玄都舊種桃山學愚

溪剝栽柳風流畫史真絕倫毫端點染猶精神王郎手抱之上載展圖示我勞重陳展圖示我勞重陳此意此畫宜其糾

漁父辭劍圖為胡學士題

梁潛

日落昭關暮烟紫東望吳中一千里江濤怒湧如雪山我無羽翼高飛難感君意氣一回顧度却洪濤心更苦腰間寶劍能言語解贈向君肝膽露丈夫相遇心相知傾情倒意何所疑窮途倉惶足悲慨此去道途猶險巖水有蛟龍山有虎知爾千秋復萬慮還君寶劍慎周防荆門路斷魂茫茫

咸陽古堞

謝貞

咸陽古帝宅雉堞何崔嵬積石隱雪色金銀雲中開
咸陽昔日稱百二函谷鷄鳴客如霧秦王按劍叱風
雷天下諸侯盡西顧三戶蕭條易水空齊歌趙舞入
秦宮龍旂五丈金樓下鳳吹千門馳道中璇霄閣道
通天極仙掌芙蓉正相直月過文窓寶扇移星臨綉
戶粧奩密綉戶文窓拂采霞黃山翠影繞宮斜王孫
挾彈雕臺樹遊女回舟綠岸花岸花感綉蓮阡陌十
馮朱門色相射玉檢登封貺岳靈金鑪鑄冶銷鋒鏑
風馳萬國奉威聲四夷惕息敢橫行金湯千里扶王
業猶遣將軍北築城可惜繁華不知秘三十六年如
一日樓船童女望蓬萊玉琢軒窓五雲色童女成仙
去不歸咸陽古堞空崔嵬黃雲捲雪城頭路城下行
人嘆落暉

天廐神兔歌

曾祭

天廐名馬不易得鳳臆龍鬣秋兔色圍官廐養十載
餘云昔來自朝鮮國想當此馬初生時蛟龍降精雷
雨垂房星夜墮水盡赤雲霧下繞靈風吹雄姿逸態
真神駿踔促蹄高雙耳峻目光夾鏡炯方瞳汗血流
珠膩紅暈朝鮮得此不敢騎覆以黃氍獻赤墀迺知

天廡盡龍種如此萬疋皆權奇今晨鞞出迥殊絕
從鑿與自超越胡趨遠蹴交河水夕秣驕嘶薊城月
君不見驂騑爾霜古亦多老不一試將柰何駑駘無
力枉蹠躩俗馬有肉空嵯峨平生憐爾獨遭遇繡勒
金鞍照瓊署相期慎保不几姿萬里長隨六龍馭

車駕北征送右諭德金公扈從

寒雲慘淡邊城異虜騎憑陵在東北天兵帶甲八十
萬千里長驅如霹靂平胡下詔親出征二月龍輿發
北京東風關塞旌旗影落日沙場鼙鼓聲知君文采
金閨彥扈從恩榮總堪羨龍泉寶帶黑貂裘虎鞞雕

弓白羽箭前帳前獻俘報捷歸帳中草檄筆若飛狼煙
乍起雪載路羌笛橫吹霜滿衣妖星夜墮氣蕭索席
捲穹廬空大漠橫行絕域拓封疆直過窮荒收部落
歸來意氣擅才雄凱歌先進明光宮豈知折衝在帷
幄世上空聞衛霍功

銅爵瓦硯歌

征西將軍蓋世雄睥睨漢鼎驕成功建安天子在掌
握車駕又從轅轅東策勳定爵分茅土赤烏煌煌輝
衮黼鑄成銅爵起高臺繡戶珠房貯歌舞繁絃急管
鳴未終葛汁啖盡金樽空分香賣履恩愛畢西陵落

日生悲風三方曷峙霸圖息玉輦金輿已陳跡冷雨
寒煙滿鄴中惟見銅駝卧荆棘誰憐地老天亦荒宮
瓦散落猶深藏千年劫火煉不化至今出土生輝光
草根藤繞苔蘚蝕鄴中野人初未識臨江太守忻得
之此物不應同瓦礫殷勤拂拭重磨礪制作豈讓端
州工鳳池先生真尚古寶此乃與瓊瑰同先生自昔
稱才俊忽見珍竒豁方寸龍香麝臍益光妍玉璽金
輝發清潤翻思淪沒塵土鄉此日還登君子堂竒姿
曾識奸雄面清玩宜親翰墨坊君不見漢家諸陵在
荒野玉魚金盃無遺者早悟愚民盜一坏不如燒作

鴛鴦瓦

姚少師所藏八駿圖

周家八馬如飛電夙昔傳聞今始見銳耳雙分秋竹
批拳毛一片桃花旋肉駿疊聳高崔嵬權竒知此真
龍媒霜蹄試踏層冰裂駿尾欲掉長飈迴瑤池宴罷
歸來早絡月羈金照京鎬紫鞵飛時逐落花雕鞍解
處眠芳草由来駿骨健且馴弄影驕嘶不動塵有時
渴飲天津水五色照見波粼粼圍官騎來難久駐飲
向春流最深處珠銜寶勒不敢疏直恐飛騰化龍去
古來善畫豈與韓此畫豈同凡馬看人間造次不可

得首藉秋深煙雨寒

燉煌曲

吐蕃健兒面如赭走入河湟放胡馬七關蕭索少人行白骨戰場縱復橫燉煌將士抱戈泣四方胡笳聲轉急烽烟斷絕鳥不飛十一年來不解圍傳檄長安終不到借兵回紇何曾歸愁雲慘淡連荒漠捲地北風吹雪落將軍錦韉暮還控壯士鐵衣夜猶著城中疋綾換斗麥決戰寧甘死鋒鏑一朝胡虜忽登城城上蕭蕭羌笛聲當時左袵從胡俗至今藏得漢衣服年年寒食憶中原還著衣冠望鄉哭老身幸存衣在

篋官軍幾時持獻捷

龍支行

龍支城頭暮欲角黃雲蔽天沙草薄虎鬣使者長安來持麾擁蓋邊塵開城門盡是胡兵守城外老人多白首拜迎使者雙泪流問云天子今安否自言家世豐州佐少小辭家隸軍戍吐蕃昨日犯蕭關胡騎長驅涇隴間將軍戰敗鼓聲絕棄戈遺鏃填丘山自從陷沒身為虜五十年来在邊土依樓部落作蕃人生長兒童盡胡語朝看烽火望中原夜聽鳴笳思故園頽垣破屋誰家宅斷磧荒谿何處村奉使還時報天

子早遣官軍復清水假令老身歸即死已免遊魂作
胡鬼

送彭秀才從大將軍英公征交阯 王英

三雲欲雨半成雪疾風吹衣冷如鐵平明師出將軍
行城頭風高鼓微叫將軍自昔膽氣豪身經百戰不
辭勞前年破賊平南交奏凱歸來功最高去年從征
斬驕虜今年又向南交去幕中賓從多賢良帳下諸
軍盡貔虎彭生本是西江人少年今作幕中賓拂衣
仗劍來別我慷慨南行思致身畫船紅樓照江水中
流放歌北風起魚龍吹浪渡三江旌旆連雲亘千里

炎州到日暮春餘銅柱山高有故墟金戈鐵馬經行
處瘴雨蠻烟盡掃除榕陰滿地花開遍邊人重覩將
軍面將軍令出聲如鐘詞客吟豪眼如電知君際遇
在斯時會見功成日下歸人生富貴須早致豈是江
南老布衣

病驥圖

周忱

吳興父子俱能畫筆端往往追曹霸當時託意知為
誰惻愴令人傷此馬此馬虺頽未可輕昔陪八駿天
衢行絲雲林籞春如海曾聽玉輅和鸞鳴一從謝病
離天仗骨聳毛焦氣凋喪耻與駑駘競粟芻自甘偃

卧沙丘上孫陽去後苦難逢寂寞誰加剪拂功羈金
絡月復何日顧影懷恩悲晚風古來千金市駿骨况
此精神那可忽飼餼重歸十二閑猶堪萬里奔騰出

漁陽老婦歌

漁陽老婦白髮多去年歸自幹難河自言本是田家
女少小姿容衆推許父母求婚來大都朱門許嫁不
須吏良人系出蒙古部阿翁仕元作樞副當時誤信
媒妁言論財竟作偏房婦含羞俛首半載餘天上兵
來北擊胡百口倉皇夜出塞散入匈奴部落居偷生
強欲隨風土旋縮盤頭學胡語區脫沙中逐井泉

鬻馬上調歌舞豈無肉食充黃梁亦有酥酪爲酒漿
族類不同天性異觸物時時懷故鄉况當夫死子尚
幼風沙易得紅顏醜婦心一片竟誰知絕漠窮荒零
落久前年天子親北征單于納款烟塵清往來信使
無虛月老身遂得離邊庭提携二子到鄉邑村墟改
變無親戚吞悲暗憶別家時別時十七今七十角尖
高帽窄衣裳半臂珠絡紅纓長兒童乍見皆掩笑元
季都人同此粧今日官家有恩例給與牛羊賜田地
太平衣食足畊桑且保白骨埋漁陽獨惜生米命何
薄虛擲春光向沙漠寄語鄰家窈窕娘早嫁無如故

鄉樂

題蕭侍御燠蘭亭圖

余吉祥

江左風流數王謝右軍辭翰尤瀟灑當時已重東山
公况乃遺流百年下暮春之初天氣新蘭亭觴咏無
雜賓乘權紀事興不淺行草半兼書入神要將翰墨
貽孫子百本丹書那得似辨才秘此亦痴絕蕭郎得
之何太詭龍顏日角真天人把翫一笑回陽春太平
正須堯舜治底用曲藝勞其神日臨月寫意不足一
戈尚命虞公續待臣自合推腹心醜好何欺魏徵目
鐵冠有柱高峨峨直道事君庸見阿君臣之義同父

子晉陽亦幸揮天戈虎跳龍卧固莫比玉匣區區
殉死真迹終翻定武碑墨本至今存有幾畫師貌得
蕭郎事寂寞瞿曇殊失意卷圖得失兩茫然對客且
談貞觀治

夜宿漁家

何起直

青山前頭小茅屋短短疎籬護脩竹江空日落不見
人行入尋傍漁家宿老翁見客辭禮疎白頭倒裹單
紗烏白云鄉村絕沽酒香羹莫煮松江鱸海月流光
照衣濕請君穩睡南邊室細將蒿蓼塞窗櫺莫遣腥
風夜吹入明朝淨洗小漁船送君直到長沙邊

姑惡鳥

陳靖遠

芳池月陰春草碧有鳥有鳥啼不息千聲萬聲道姑
惡粉面低回淚痕落姑惡姑惡姑不惡勉力窓前勤
織作食蚕繅繭縫裳衣一家和悅無怨咨汝道姑惡
胡不思新婦會做阿家時

過鹿門山

薛瑄

西來漢水浸山根舟人云此是鹿門峭壁蒼蒼石色
古曲逕杳杳藤蘿昏亂峰幽谷不知數底是龐公栖
隱處含情一笑江風清雙櫓急搖下灘去

皇明風雅卷之十二

